

桂苑筆畀

隸

14
1475
37



門 4
號 1475
卷 37

桂苑筆耕集卷十六

祭文書記疏十首

唐高麗都統巡官侍御史內供奉崔致遠撰

祭文 四首

祭五方文

築羊馬城祭土地文

祭楚州陣亡將士文

寒食祭陣亡將士文

書 二首

移浙西陳司徒廟書

桂苑筆耕集卷十六

海山仙館叢書

昭和十五年
十一月二日
購求

手札一首

記 二首

西州羅城圖記

補安南錄異圖記

疏 二首

求化修天雲寺疏

求化修諸道觀疏

祭五方文

年月日具銜某謹以清酌庶羞量幣之奠敢昭告於五

方神之靈傳不云乎五行之官是謂五官封爲上公祀
爲貴神社稷五祀是尊是奉木正曰句芒火正曰祝融
金正曰蓐收水正曰元冥土正曰后土是以禮云其工
氏之霸九州也其子曰后土能平九州故祀以爲社然
則神主順天靈功莫測諸侯列土祀典宜行惟夫人實
統陰祇廣合坤德身爲萬物之母首冠五方之君職奉
軒皇功標缺社殷湯罷改遷之議漢武陳祠祭之誠是
知神鑑則無偏無頗物情則以享以祀昔平九土既能
疏決江河今處五方豈不庇安淮海靈其調和於金木

水火驅役於風雨雪霜使春夏秋冬永息灾殃之氣東西南北靜除氛祲之源牢幣具陳庶羞甚潔致敬不虧於中雷施恩幸滿於大藩唯候豐穰冀申報賽尙饗

築羊馬城祭土地文

年月日具銜某以兵戎未息禦備是勤乃命修築羊馬城遂遣某官某乙告於土地之神曰夫城郭之設邑居所憑陋之則狡者或_缺美之則寡能固守况今豺聲競發虺毒遍吹易動難安何處能爲樂境暫勞永泰此時須建良功遂乃揣高卑議遠近便令百堵皆作終可三

旬而成微名於伏櫪觸楹接勢於長雲斷岸不假龜行之跡豈須龍見之期眾旣叶心事無費力神其德惟博載道實流謙勿辭板築之喧勉致金湯之固使雲螯雷杵遠振歡聲鳥堞隼墉高標壯觀北吞淮月南吸江烟平欺鐵甕之名迴壓金甌之記有備無患神其聽之

祭楚州陣亡將士文

爾等尺籍從軍寸心報國羔裘武飾旣以力稱馬革雄圖早將身許爰有徐孽來侵楚封春喉之壯氣未申失手之冤聲遽起始見荷戈就列翻爲復矢成行然而功

其可稱死且不朽有狼曠之君子無羊斟之小人昔時
之重義輕生不求苟活今日之名存身喪豈貯遺悲魂
其有知各歆薄酌

寒食祭陣亡將士文

嗚呼生也有涯古今所歎名之不朽忠義爲先爾等曠
弩勞身蒙輪逞力奮氣於熊羆之列忘形於鵝鶴之前
能衍勇於干戈固免慙於牀第今也野草綠色林鷺好
音杳杳逝川空流恨而無極纍纍荒塚誰驗魂之有知
我所念兮舊功勞我所傷兮好時節俾陳薄酌用慰冥

遊其謀抗賊於杜回無效懷歸於溫序能成壯志是謂
陰功

移浙西陳司徒廟書

滔滔逝水幽顯雖殊凜凜雄風古今何讓苟或同心立
事必能異代論交司徒壯節奇功備載外孫之碣靈恩
顯驗高傳太伯之鄉譚揚而不假再三徵引而難窮萬
一今則冀動元鑑直書素誠旣當可舉而行固在不言
而信且此誓除國難齊命舟師將泛西江卽離北岸練
鋪一水指疆界以雖分黛列千山望威靈而如在今於

槃境已立巖祠敬迓來儀迺酬前願幸移玉趾無戀石
頭桂檝蘭橈早決遷居之計鸞絲鳳管佇申迎奉之儀
况乃近境無虞芳筵不絕但得禍淫福善何妨捨舊從
新北渚烟花休起別離之恨東塘風月好追歌舞之歡
必能依統帥指揮永可振司徒勲業特差專介用啓至
誠昔之青骨標奇已謂陰陽不測今也赤眉稔惡豈宜
征戰無功將申烈烈之威實假冥冥之助所冀八公山
上遍設雄師五里霧中能呈異術則必陰子春之破賊
吳大帝之封王共立功名若合符契無誤會稽之軍備

有慙卽墨之神謀早詳禴祭之言永副里仁之義某白

手札

風煙雖邇雲霧難披景仰靈威遙申誠願今已靜搜勝
地高創壽官永可安居謹令咨迓便請挈家速至專當
掃席相迎且鐵甕城低金陵地狹能施百福無滯一方
此欲劔拂妖星旗迎聖日必期大捷永致中興幸其來
助陰兵共成王事目極東流之雪浪心馳北顧之煙峯
神兮移來哀江南某白

西州羅城圖記

西州羅城四仞高三尋闊周三十三里乃今淮海太守
燕公所築也粵若梁州別壤蜀國雄都內跨犍犍外聯
蠻蠻左臨百濮右挾六戎咽喉之控引實繫唇齒之輔
依難保自昔鼈靈流異龜跡標奇藩籬始建其一城肩
鎬猶虧於四郭莒子則既忘重閉衛人則唯慮徙居蠹
彼狗封恣其狼戾每至草乾藁道浪縮瀘河則必椎紒
橫侵撥羣驅隊編屯攝竄巷哭街號戎兵以拔旆爲中
權府尹以閉關爲上策稔成氛積有歲時洎乾符初
偶絕羈縻大興伴奐白虎之狂災漸熾黃龍之舊約難

尋兵力莫申帝心有寄以公慶傳渭夢業練圮書交趾
銘勳則永威八詔鄆城報政則不待三年屬蠻寇加囂
王師告老遂飛急詔請救倒懸由是自東徂西以晝繼
夜走單車於外境豈煩龔遂獻書受戎輅於中途莫掩
晉侯稱伯公鄆行次咸陽除授西川節制遙銜睿畧倏達成都於時驟
信屯兵逼郊遂而纔踰一舍黔黎失業焚里閭而何啻
萬家彼則舉國而濟師此則闔城而受弊外熾崑岡之
焰喫酒無能內枯疏勒之源指梅何益莫非枕倚牆壁
誰堪擐執甲兵公至止之日豁啓城扉若開籠檻威振

而寧勞利器邪膽皆摧化行而如嗅新香驚魂盡返蠻
 王以鑿耳飽聆其異畧鏤膚畏挂於嚴誅洵然觀電懼
 雷歛爾鳥飛魚散公每令選銳暫使追逃乘其垂翅之
 時展我燎毛之勢數俘莫記執馘居多爾後因閱地圖
 得搜天險是猿狖養窩之窟為豺狼伺隙之蹊乃令一
 叛雄關一標巨防修防峽關置平夷鎮蠻賊要路固守無虞危堞則憑巒助
 峻長溝則導澗資深宛成善閉之機實扼間行之徑九
 泥可固斷知無得而踰燿火罷驚坐見不爭而勝仍尋
 水道別建河營大渡河側置防河營遠方猾夏之徒難謀航葦均

發戍申之卒免詠流薪疆陲永保於覆孟塵閑唯矜於
 列鼎卿雲邦彥閒吟搜吐鳳之詞卓鄭鄉豪靜坐貯躡
 鳴之利公以寢處戎閫夢想扁舟將申遠慮於無窮豈
 立空言為不朽乃曰彼蠻之習也外癡內黠朝四暮三
 雖莊叔此時功已成於長狄而季孫他日憂必在於顛
 與詎可虛號錦城尙無羅郭守民之制非我而誰啓抱
 而神欽至誠飛章而帝允丹請時有賓寮進難將校獻
 疑皆云公孫述躍馬雄臨非無意也諸葛亮臥龍崛起
 亦有志焉但以曩築子城猶資客土九年方就百代所

難蜀缺無土昔張儀築子城輦土於難學射山日役往返九載後始成况今將興廓落之

基恐致遷延之誚公曰衍先定事當速成必能終簡

天心豈謂虛穿地脈於是郡侯奔告邑尹樂從乃使揣

高卑議遠邇慮材用量事期採時候於魯書佚規模於

周令引長江而副長塹夏禹慙能對高巘而劃高墉秦

皇失色矧乃命五丁而嘯侶運六甲以驅神天吳則滲

水於寒泉地媪則變沙為美土蜀地穿未盈尺泉源漲起至是土出沙中城缺

如實謂百靈幽贊萬姓悅隨錡聚雲濃杵騰雷響不見

烈風淫雨又令簋飽觴酣登登而只競歡呼屹屹而便

如湧出百堵皆作三旬而成然後郢匠勞功素材變質

優人展妙楨壤凝華攢空而烽櫓高排架險而闔閭聳

起橫分八尺結雕甍而彩鳳聯飛檻徹四隅擁繡堞而

晴虹直挂罩一川之佳景籠萬戶之歡聲遠而望焉則

巍巍峩峩若雲中之巖嶂錦霞縠霧隱映乎其上迫而

察也則赫赫燁燁想海畔之仙山金臺銀闕焜耀乎其

間始自庀徒終於解役不假朽緡於官稅無資剖粒於

軍租築板所費錢一百五十六萬貫米一十九萬石皆由智計不假上供皆聚羨財儼成

壯觀遂使蠻酋褫魄賓旅歸心不敢言摩壘而旋無因

致入郢之役爰徵繪事仰貢九重旋降綸言過褒一字
 宣睿旨於翰林才子綴妍辭於黃絹外孫築城碑今租庸王相公承旨撰
 公雖迎金鳳銜書未議石龜戴版蓋乃謙冲自牧
 耻其功伐驟稱及蒼鳥高飛翠華遠狩儼仙遊於玉壘
 安聖慮於錦城故得親覽宏規益欽忠節特傳瑤檢微
 進碑詞遂命雕鐫永揚威烈實萬古未聆之事乃四方
 無比之榮美矣哉龍以雲興魚因水樂誰不仰公智周
 物表事照機先凡施權謀若合符契在昔全蜀未城也
 天畱盛績日待英才所謂有非常之人然後有非常之

事有非常之事然後有非常之功是以非常者固非常
 人之所覲也致遠雖邱堂觀奧師冕何知而秦國斂賢
 由余不棄謹成實錄敢記殊庸所冀四海梯航閱雄圖
 而稽顙九州旄鉞望法駕而安心中和三年龍集癸卯
 八月二十五日記

補安南錄異圖記

交趾四封圖經詳矣然而管多生獠境邇諸蕃畧採俚
 譚用標方志安南之為府也巡屬一十二郡峯驩演愛陸長郡諒
 武定武安蘇茂虞林 躡縻五十八州府城東至南溟四百餘里有

山橫亘千里而遙邃穴深巖為獠窟宅蠻蠻之眾六種
星居鄰諸蕃二十一區管生獠二十一輩水之西南則
通閩婆大食之國陸之西北則接女國烏蠻之路曾無
亭埃莫審塗程踣履者計日指期沈浮者占風定信二
十一國雞犬傳聲服食所宜大較相類管內生獠多號
山蹄或被髮鏤身或穿骨鑿齒訛音嘲嗜姦態睚眦其
中尤異者臥使頭飛飲於鼻受豹皮裹體龜殼蔽形擣
木絮而為裘獠子多衣木皮熟擣有如織纈編竹筥而作翅生養則夫
妻代豢長成則父子爭雄縱時有傳譯可通亦俗無桑

蠶之業唯織雜彩狹布多披短襟交衫或有不縫而衣
不粒而食死喪無服嫁娶不媒戰有排刀病無藥餌固
恃險阻各稱會豪遠自漢朝迄於隋季荐興邊患頗役
遐征馬將軍標柱歸時才分地界史總管倒碑過後畧
靜海隅洎咸通初驃信挺灾元戎喪律鴟嘯於跼鳶之
地豕豕於東馬之塗摧寬欲快於椿喉拯溺唯思於援
手先帝以今淮海太尉燕公威宣大漠政治上都時公防禦
秦城刻平醜虜才歸輦下出鎮安南乃請出鎮龍編立身豹畧刻彫題而
卵碎活黔首以肌豐復壁壘於一麾拔封疆於萬里有

蠹皆削無冤不伸 朱道古稔姦於外杜存凌恣虐於內皆為安南巨患公乃誅滅無遺故褚令公遂良竄歿日南子孫凋零公特表洗雪 然後使電母雷公鑿外域朝天之路山靈水若偃大洋沃日之波 安南經崖口天威神功所開播在遠邇 遂得絕蠻謀之北窺紆漢軍之南戍乃鳳傳徵詔鷁泛歸程至於洞獠海蠻莫不醉恩飽義遠投聖闕請建生祠則知善政所行殊方可誘既見馬如羊而不敢縱令蟻若象而何虞足以驗四夷之時或不實九牧之任不得所也有柔遠軍從事吳降嘗集是圖名曰錄異敘云久客遐蕃日擊殊形手題本事然則信以傳信斯焉取

斯 缺 閱前詞退而歎曰愚之所以為異者其諸異乎人之所異曰六合之內何物則稟至如鼠肉萬觔蝦鬚一丈既知南北所產永釋古今之疑則彼獸性羣分鳥聲類聚誠不足異也頃太尉燕公受三顧恩用六奇計使獷悍歸服邊陲晏然今聖上省方蒙王獻款不敢弄吠堯之口永能除猾夏之心皆由燕公收交州鎮蜀郡威振於奔軀走魅功成於金壘湯池所謂蘊先見之能察未來之事呼吸而陰陽不測指蹤而神鬼交馳實為天工人其代之斯實可為異矣聊補所闕敢貽將來時翠

華幸蜀之三載也

求化修大雲寺疏

大雲寺募緣求化重修建瓦木功價等詳夫教列爲三節居其一其如妙旨則暗裨元化微言則廣諭凡流開張勸善之門解摘執迷之網然則欲使眾心歸敬須令像設莊嚴有感必通無求不應墾情困而種福游法海而消殃不可思議於是乎在當州城西大雲寺雖臨楚甸實壓蜀岡舊創仁祠高標兌位兩洗烟窗之色萬朶前山風敲月砌之聲千株古木在一郡乃偏爲勝景於

四時則最稱芳辰至如春水綠波雜花生樹都人士女以遨以遊不勞聽法之緣自得消憂之所則與城東禪智寺雙肩對聳兩耳齊張夾煬帝之遺宮擁淮王之仙宅壯茲樂土倚彼福田前年偶值飛蝗未能避境旋又聚蟻或欲毀堤故護軍特進以將隔妖氛忽興猛焰遂使璫璃之界翻成煨燼之餘雖菩薩焚身固爲常事而苾芻住足盡失安居可惜祇園便同隙地今幸遇太尉將驅眾旅佇滅羣冤旣逃過去之灾或補未來之福欲安盛府許葺精廬欲使爐續朝香鐘迎夜梵樹宿獼猴

之友林棲鸚鵡之王蓋因貞觀之中曾傳帝語豈效太
清之末酷信仰譚所願廣運慈航徐楫法鼓深資功德
靜剗妖魔百官榮從於鸞旌萬乘遄歸於象闕次願太
尉廊清寰宇高坐廟堂演伽葉之真宗龍堪比德舉儒
童之善教麟不失時克興上古之風永致大同之化凡
於戴髮含齒鱗潛羽翔皆號慈悲能盡解脫但以一毛
可拔先求信義之心百足不僵須賴扶持之力既難獨
辦固托重緣無吝羨財合資洪福富者不仁之說自古
所譏積而能散之規於今可誠謹疏

求化修諸道觀疏

紫極宮重修城下諸宮觀求化瓦木等價伏以苦縣誕
靈神州演法真性乃聖朝之祖強名爲至道之宗玉葉
金柯耀芳陰於萬代瑤函瓊笈傳妙旨於四方遂得齋
醮有歸科儀無墜神宮靈宇宛寫諸天祕殿精壇嚴修
勝地當州東吳麗俗南充雄藩鮑參軍則賦銜精妍揚
執戟則箴誇天矯而乃至道少勤行者元門無善閉之
味澹口中動成大笑義深目外誰信上昇福庭則草沒
塵侵仙室則雨傾風壞况值梟聲競噪虺毒強吹到處

星飛但見羽書之急經年霧集唯聆甲騎之勞俗既喧
驚教增寂默未有葺修之暇非無捨施之緣今幸遇太
尉德繼猶龍道深有象黃石公之妙訣雅稱帝師赤松
子之勝遊佇迎仙友是故出則以六奇除敵入則以九
轉服勤靜制閩外之烟塵間對壺中之日月三元遵敬
一氣精修果見真位高遷殊祥荐降彩雲片片飛來楚
岫之風元鶴雙雙暎向隋宮之月又乃前年則江寇南
逼去歲則淮戎北侵蟻皆恃於成羣蛇欲驚於結陣伏
賴太尉雄威坐振眾孽奔亡四鄰戴信於桓公八郡感

恩於邵父親耕農之蔽野聽歌吹之沸天古人有言爲
可爲於可爲之時則可其城下宮觀今欲旋集良工增
修舊址擬金室銀堂之制處處騰光俾星冠月帔之徒
人人潔跡微功若就良願克伸龍圖早耀於中興虎旅
永摧其大盜次願太尉運籌佐漢迴掩張良拊棹遊湖
靜追范蠡石畱馬跡臺挂鳳音蓬島花開春醉而閒乘
白鹿芝田雨過曉耕而長任青牛罷吟小桂之篇獨邁
大椿之壽然後仰從翔翼俯至潛鱗凡曰含虛悉能蒙
福但以所修宮觀荒摧旣久經費甚多無因獨辦資糧

唯仰眾成功德迦譚之難捨能捨猶見樂輸道教之自
然而然幸無輕諾謹疏

桂苑筆耕集卷十六

南海譚瑩校

桂苑筆耕集卷十七

啓詩狀共四十首

啓 四首

初投獻太尉啓

再獻啓

謝生料啓

獻詩啓

詩 三十首

七言紀德詩三十首謹獻司徒相公

狀 六首

謝職狀

謝借宅狀

出師後告辭狀

謝令從軍狀

謝借舫子狀

謝許奏薦狀

初投獻太尉啓

某啓伏以嶽之高與海之深物所歸而人所仰迴拔干
仞平吞百川其如巘嶸擎天波瀾蘸日豁四方之眼醒

萬族之魂是宇內之所歌謠匪毫端之能贊詠伏惟司
徒相公獨抱神畧一匡聖朝譽洽於良哉康哉名標於
可久可大龔黃德政則郡民有遺愛之碑韓白功勳則
國史有直書之筆况某劣同窺豹淺比傾螺難將篆刻
之詞輒頌陶鎔之業但以間生賢哲年當五百之期廣
集英豪客滿三千之數既納之似水則來者如雲斯乃
司徒相公鏡於心而寬兮綽兮秤於事而無偏無黨網
羅雋彥籠罩驍雄於儒則沈謝呈才於武則關張効力
遂使弓旌招隱士巖谷爲之一空介冑降叛夫烟塵爲

之四息豈獨分憂於闕外實惟稱慶於寰中莫不信齊
於春夏秋冬恩播於東西南北但日月照臨之所是風
雷變化之時然則尼父堂中亦有他鄉之子孟嘗門下
寧無遠地之人片善可稱前賢不讓永能執大邦之政
豈欲遺小國之賢是以敢寫微衷輕投朗鑑某新羅人
也身也賤性也愚才不雄學不瞻雖形骸則鄙年齒未
衰自十二始別雞林至二十則遷鷺谷方接青衿之侶
旋從黃綬之官既忝登龍敢言絆驥今者乍離一尉欲
應三篇更願進修且謀退縮獨依林藪再閱邱墳課日

攻詩虞訥之詆訶無避積年著賦陸機之哂笑何慙俟
其敦閱致功琢磨成器求魚道在垂竿而不挂曲鉤射
鵠心專撚筈而冀銜後鏃端操勁節佇望良時竊見萬
物投誠八紘嚮德不謁相公賓閣不遊相公德門者詞
人之所懷慙羣議之所發誚某故敢隳肝瀝膽進牘抽
毫不避嚴誅輒申素懇謹錄所業習篇章五軸兼陳情
七言長句詩一百篇齋沐上獻冒犯尊威不任戰懼之
至謹啓

再獻啓

某啓某今日五日謹以所學篇章五通貢于賓次雖慙
獻豕輒覬攀龍脩客路以心摧望仁風以目斷乍覩秦
雲之態或似美人細看燕石之姿恐爲棄物伏爲司徒
相公光逾愛日煦及寒灰念以遠別海隅久沈江徼特
垂豐餼俾濟朝饑自驚樗櫟之材已荷稻粱之惠雖龜
魚投水驟喜命蘇而蚤蝨負山深憂力敗且某也兔絲
雖絡蛛網自營萬計尋思不如學也百年勤苦猶恐失
之所以未競宦塗但遵儒道筮仕而懶趨塵土卜居而
貪憶林泉人間之要路通津眼無開處物外之青山綠

水夢有歸時所願更淬鉛刀終求鐵印斂跡而跼藏學
藪安身而跌宕詞林嘗誦古詩還符此意云志士惜日
短愁人知夜長某旣懷志士之勤又抱愁人之苦聊憑
毫牘敢述肺肝且如蹋壁冥搜杜門寂坐席冷而窗風
擺雪筆乾而硯水成冰欲爲尼父之絕編無奈羲和之
促轡卽可知指萬卷之經史恨三冬之景光及其凍枕
傷神孤燈伴影寒漏則滴殘別淚遙碓則搗破羈心空
勞甯戚之悲歌莫繼陸機之安寢亦可想貯千端之鬱
邑過五夜之寂寥然則志士之勤也旣如彼愁人之苦

也又如此况某家遙日域路隔天池投客舍而方甚死
讎指何門而欲安生計唯慮道之將廢豈言人不易知
不敢以陋質凡姿覲相公清嚴之德不敢以片言隻字
希相公採錄之恩所望者或以其萬里地遠來十餘年
苦學稍垂惻憫得濟困窮則必堅背水之心終爲勇士
決移山之志不讓愚公伏以某譯殊方之語言學聖代
之章句舞態則難爲短袖辯詞則未比長裾舌無三寸
之能空絨壯氣腸有九迴之懇但戀深恩干浼尊嚴下
情無任感戴兢惶涕泗之至謹啓

謝生料啓

某啓某昨日伏蒙仁慈再賜生料恩垂望外喜集愁中
安貧而已贍晨炊感德而唯知宿飽遂使范家釜甑免
恨長閒顏巷簞瓢倍加其樂伏以某雖楊會穿葉而蓬
且斷根空把利錐冀遇大賢之鑑豈將長鋏先興下客
之歌一昨輒貢蕪音累塵尊聽窺德宇而燕雖相賀望
威風而鷁恐退飛豈料司空相公俯念海人久爲塵吏
特垂記錄繼賜沾濡前生之溝壑無虞饑寒雖濟頭上
之邱山漸重負戴難勝依投而旣類窮猿展效而願同

病雀下情無任云云

獻詩啓

某啓某竊覽同年顧雲校書獻相公長啓一首短歌十篇學派則鯨噴海濤詞鋒則劍倚雲漢備爲贊頌永可流傳如某者跡自外方藝唯下品雖儒宮慕善每嘗窺顏冉之牆而筆陣爭雄未得摩曹劉之壘但以幸遊樂國獲覩仁風久貯懇誠冀伸歌詠輒獻紀德絕句詩三十首謹封如別定王拙舞適足自嫌嫫母濃粧轉爲人笑不足贊揚休烈翻憂浼黷尊威然聖人以激勸誠深

不間互鄉童子學者以揣摩志切皆投鬼谷先生伏惟特恕荒蕪俯垂采覽所冀趨仁化於江北終得傳美譚於海東唐突藻鑑下情無任戰慄之至謹啓

七言紀德詩三十首謹獻司徒相公

兵機

惟將志業練春秋早蓄雄心刻國讎二十年來天下事漢皇高枕倚畱侯

筆法

見說書窗暫臥龍神傳妙訣助奇鋒也知外國人爭學

惟恨無因乞手蹤南朝蕭子雲善書百濟使人求手蹤以為國寶

性箴

波澄性海見深源理究希夷闢道門詞翰好傳雙美跡
何須更寫五千言

雪詠

五色毫編六出花三冬吟徹四方誇始知絕句勝聯句
從此芳名掩謝家

射鵬

能將一箭落雙鵬萬里胡塵當日銷永使威名振沙漠

犬戎無復吠唐堯

安化

班筆由來不暗投旋驅熊隼待封侯郡名安化能宣化
更指河湟地欲收

練兵

隴水聲秋塞草間霍將軍暫入長安太平天子憐才畧
曾請陳兵盡日看

礮溪

刻石書蹤妙入神一迴窺覽一迴新况能早遂王師業

桃李終成萬代春
伏觀相公礮溪詩云及到王師身已老不知辛苦爲何人又經號縣詩云手栽桃李十餘春今日經過重建勳

射虎

鋸牙鉤爪礙王程
一箭摧斑四海驚
口額前驅姜膽碎
方知破石是虛聲

秦城

遠提龍劍鎮龍庭
外戶從茲永罷扃
掃盡邊塵更無事
暮天寒角醉吟聽

生祠

古來難化是蠻夷
交趾何人得去思
萬代聖朝青史上
獨傳溪峒立生祠

射鞭

休說戟枝非易中
莫言楊葉是難穿
須看立節沙場上
永得安邊爲射鞭

安南

西戎始定南蠻起
都護能摧驃信威
萬里封疆萬戶口
一麾風雨盡收歸

天威徑

鑿斷龍門猶勞身擘分華嶽徒稱神如何劈開海山道
坐令八國爭來賓

峇口徑

濟物能迴造化心驅山偃海立功深安南真得安南界
從此蠻兵不敢侵

收城碑

功業已標征北賦威名初建鎮南碑終知不朽齊銅柱
况是儒宗綴色絲

碑今度支裴僕射撰詞

執金吾

一陣風雷定八蠻來趨雲陛悅天顏王孫仕宦多榮貴
心爲匡君不暫閒

天平

海岱烟塵匝鄆城遙揮一劍落櫓槍征旗不動降旗盡
永使天平地亦平

釣魚亭

錦筵花下飛鸚鵡羅袖風前唱鷓鴣占得仙家詩酒興
閒吟烟月憶蓬壺

伏觀相公在鄆州詩云酒滿金船花滿枝雙娥齊唱鷓鴣詞又釣魚亭詩

云水急魚難釣風吹柳易低

相印

早說休徵應佩刀
台星光接將星高
欲迎霖雨歸龍闕
看滅妖氛展豹韜

西川

遠持龍旆活龜城
威懾蒙王永罷兵
應笑欒巴喫杯酒
兩師風伯自歸行

平蠻

邛峽關東蠻塵絕
平夷鎮扼蠻地裂
又築羅城變錦城
蠻兵永滅功不滅

築城

一心能感眾心齊
鐵甕高吞劔閣低
多上散花樓上望
江山供盡好詩題

荆南

虎吼龍驤出峽來
福星才照陣雲開
遙思屈宋忠魂在
應向風前奠一杯

漕運

濟川已展爲舟業
煮海終成富國功
能與吾君緩宵旰
爲資心計四方通

浙西

九江賊膽望風摧萬戶愁眉向日開
楚舞吳歌一何樂相逢相賀相公來

降寇

唯將德化欲銷兵常笑長平恣意坑
更想太邱行小惠何如言下濟羣生

淮南

八郡榮超陶太尉三邊靜掩霍嫖姚
玉皇終日留金鼎應待淮王手自調

劔南荆南淮南乃天下名鎮相公累移節制西戎南蠻東鄙賊起相公皆

自討除

朝上清

齊心不倦自朝真豈為修仙欲濟人
天上香風吹楚澤江南江北鎮成春

陳情

俗眼難窺冰雪姿終朝共詠小山詞
此身依托同雞犬他日昇天莫棄遺

謝職狀

右某今月二十五日伏奉公牒特賜署充館驛巡官者

木苑筆集卷十七
恩降台階光生旅舍承命而吟魂乍懾叨榮而病骨能
蘇攀依有心荷戴無力伏以某櫟生曠野莠託荒田豈
惟良匠不窺抑亦農人見棄風欹弱植難舉勢於凌雲
塵織纖莖但懷愁於委地昨者不慙狷者輒效狂生累
貢巴詞仰贖秦鑑伏惟司徒相公念某來從異域遠寓
樂郊俯愛似龍不嫌非鳳拔衰英於糞上搜滯刃於獄
中許廁嘉賓仍沾厚俸神仙見顧稍親郭隗之臺鴛蹇
何施得主鄭莊之驛况乃念子襟之志業辱華衮之褒
詞刻畫恩深已能長價琢磨志切終願成功修身則飲

水懷冰鍊思則吟煙嘯露唯當勵節以謂報恩謹詣衙
門祇候陳謝下情無任感激彷徨榮懼之至謹狀

謝借宅狀

右某昨日客司奉傳處分借賜官宅安下者仰聆尊旨
俯省庸才既榮投跡之有門唯恨殺身之無路伏以某
自趨龍旆免泣牛衣職俸非輕書糧頗贍嘗讀魯論語
曰學而優則仕仕而優則學是以望東開之閣永誓依
仁坐北面之窗唯期肄業非敢隱居而不嫁祗將直道
而自媒今者幸寓樂郊况棲靜室登屨則不勞涉遠簞

瓢則永遂安貧豈謂愛閒誠堪養勇三年就學非缺慕
藺之心一日成功願滿依劉之志下情無任感恩激切
兢惕之至謹詣衙門祇候陳謝謹狀

出師後告辭狀

右某伏念來從異域託在德門昔曾名列桂科未知稱
意今忝職居蓮府始覺榮身恩既厚於稻梁跡能安於
萍梗日增學植月瞻書糧豈期市駿之金傍沾鴛蹇惟
愧封侯之印未效禎祥今者屬以大憝通誅中朝多難
頃煩豹畧佇滅豺聲伏惟太尉相公身耀福星均臨庶

類手傾霖雨遍洗妖氛遠命舟師重興國祚華夷則望
風競林蠹植則尅日當蘇若某者空有肺腸方申禱祝
恨無羽翼一遂奮飛望龍節以魂銷窺虎威而股慄雖
則熊羆之力共喜安人其如犬馬之心常增戀主下情
無任攀依激切涕泣之至謹狀

謝令從軍狀

右某適見客司奉傳處分令借舟船隨從行李者深恩
既降壯氣潛伸勵心而願效驅馳感德而難勝踴躍伏
以某塵中走吏海外腐儒五能非自濟之資一割無可

施之處惟增慷慨已分沈淪豈無投筆之心時應未偶
空有請纓之志力且難成誰謂忽被殊私不遺賤跡許
隨旌旆借賜舟航蹇足無堪敢望維駒之念麼姿何幸
遠叨泛鷁之榮况當泣路之時永荷濟川之賜下情無
任感戴欣躍兢惕之至謹狀

謝借舫子狀

客司奉傳處分借賜舫子安下者某方脫窮鱗得攀畫
鷁自慙跡在塵吏忽訝身為水仙則彼甘寧割錦纜而
呈奢顧愷毀布帆而無恙豈若榮棲德宇又泛仙舟風

波無失所之憂烟月有樓吟之暇况清流滿望暑氣銷
威每當定志安神則乃銘肌刻骨謹課七言長句詩一
首齋沐上獻干贖台階下情無任荷戴兢惕之至謹狀

謝許奏薦狀

右某昨日見衙前兵馬使曠師禮奉傳處分特賜慰問
兼許奏薦令自修狀本來者俯慙蓬跡仰聽蘭言喜抃
而身輕欲飛驚惶而心戰難遏何者某職叨鄭驛已謂
極榮名達堯階實為過望憑何展效佩此恩光况乃明
鑑冰開英才霧集所宜倒屣則先迎王粲築臺則次接

劇辛如某者輟耕海上之田來泣塵中之路雖云遊學
尙未成功豈料勤勞莫副於指蹤將念已傳於卵翼許
令伐善將使警愚每思邠子之驟稱深慙速詢欲效黃
公之多讓又恐失時冀緝拙詞仰遵嚴命南宮适之間
宜父實有所歸東方朔之對漢皇寧辭自責既忝風雷
之變化佇期雨露之沾濡下情無任感戴榮抃兢灼之
至謹奉狀陳謝謹狀

桂苑筆耕集卷十七

南海譚瑩校



桂苑筆耕集卷十八

狀啓共二十五首

狀啓

狀二十二
首啓三首

賀破淮口賊狀

賀高司馬官狀

謝職狀

長啓

謝加料錢狀

謝衣段狀

謝借示法雲寺天王記狀

謝示延和閣記碑狀

謝改職狀

謝探請料錢狀

與恩門裴秀才求事啓

前湖南觀察巡官裴瓌啓

獻生日物狀五首

端午節送物狀二首

謝新茶狀

謝櫻桃狀

謝冬至節料狀

謝寒食節料狀

謝社日酒肉狀

謝匹段狀

賀破淮口賊狀

右某昨日竊聆淮口鎮狀報今月八日諸軍合勢殺戮
狂賊已盡者伏以徐州賊黨偶因嘯聚敢恣喧張鴟梟
同巢勢必不久蟣蝨相弔生能幾何猶懷拒轍之心未
有返轅之意伏賴太尉相公雄聲遠振妙畧潛施謀安

四方決勝千里遂使淮山樂境長承虎豹之威泗水孤
城免作鯨鯢之餌功著於暫勞永息計資於彼竭我盈
小盜旋除中興可望三軍之勇氣方振百姓之驚魂再
蘇但仰恩威咸增抃躍謹祇候陳賀謹狀

賀高司馬除官

某啓伏承司馬二十五郎榮膺寵命伏惟感慰伏以漢
朝美仕稱太傅少傅之榮晉代高流誇大阮小阮之譽
然而但欲脫身於利祿無非縱志於歌吟於臣則虧報
主之誠爲子則失榮親之節豈期太尉相公重言天應

美命風行遂令司馬二十五郎挂綵衣披朱紱動高堂
之喜色振德宇之嘉聲佐理多聞藹餘芳於玉樹連官
獨貴掩前哲於竹林某每愧小儒忝棲大廈覩鷓鴣之
逸勢貯燕雀之歡心下情無任抃躍之至謹奉啓陳賀
謹啓

謝職狀

右某志雖求已藝不及人伏蒙太尉相公仁慈肉被摧
骸翼成暇卯難飾片言隻字粗伸感德懷恩今則苟貯
血誠敢憑毫素先甘鼎鑊仰贖旌幢謹具長書咨陳下

情無任戰灼之至伏惟特寬罪誅俯賜念察謹狀

長啓

某啓某伏以短綆不可以汲深頑鋒不可以剗滯是故不能者止周任有言自宜量力而行豈可從心所欲某東海一布衣也頃者萬里辭家十年觀國本望止於牘尾科第江淮一縣令耳前年冬罷離末尉望應宏詞計決居山暫爲隱退學期至海更自琢磨俱緣祿俸無餘書糧不濟輒攜勃箒來掃膺門豈料太尉相公迴垂獎憐便署職秩跡趨鄭驛身寓陶窗免憂東郭之貧但養

北宮之勇去年中夏伏遇出師忽賜招呼猥加驅策許隨龍旆久倚鷁舟每恨布鼓音凡鈴刀器鈍縱傾肝膽莫副指蹤遽蒙念以慕善依仁特賜奏薦重言天應忝獲超昇若非九重倚賴於功名十道遵承於法令則其恩命亦豈肯許某自江外一上縣尉便授內殿憲秩又兼章紱且見聖朝簪裾烜赫子弟出身入仕二三十年猶挂藍袍未趨蓮幕者多矣况如某異域之士乎昔有一日九遷無以及斯榮盛某嘗讀魯論見仲尼使漆雕開仕對曰仕進之道未能究習善其深志夫子致悅某

雖慙不敏竊有慕焉昨蒙恩慈特賜轉職等已具狀陳讓兼納所賜公牒伏奉批誨卽有勅命但請收之某旣蒙未允至誠固且仰遵嚴旨立愧形影坐驚神魂每當夜對寒缸曉窺清鏡感激而頤橫涕雨憂惶而背浹汗漿雖榮擺脫於風塵倍赧汚蹟於門館伏以太尉相公雄名峻望碩德茂勳不唯雲覆九州抑亦風揚萬國寓目傾耳仰爲指南儒武所歸一人而已是以諸道景附馬首是瞻其如都統巡官須選人材稱職外塞四方之望內資十乘之威若今某塵玷恩知尸素缺位但恐買

戎狄之笑沽史傳之譏昔漢朝金日磾常在武帝左右帝欲別加寵遇日磾辭曰臣外國人且使匈奴輕漢某今日之請實在於茲諸廳郎官早陳公議蓋以賤無妨貴欲令夷不亂華某伏自前年得在門下更無知識唯謁諸廳幕中垂情幸而獲看竊聆太尉相公去年夏於東塘顧問某之時諸郎官同力薦揚和之如響遂沾厚遇遽竊殊榮昨者繼陳讜言不徇尊旨實乃惜太尉相公之名望存淮南藩府之規儀事體不虧裨贊斯在冬末面奉處分欲使別開院宇雖承恩諾轉切憂懷何者

六韜曰人才大小猶如斗也不可盛石滿則棄矣故孔子云孟公綽爲趙魏老則優不可以爲滕薛大夫今者甘寘嚴誅輒傾直懇乞解所職以弭官誦可也伏惟太尉相公特賜允從令得其所儻蒙未垂擯棄猶許依棲則望或別補冗員或薄支虛給一枝數粒可養羽毛斗水尺波得安鬻鬻固非矯飾廉讓爲名實願揣量分淮免成負累恩德春秋齊侯使敬仲爲卿辭曰羈旅之臣免於罪戾施於負擔所獲多矣敢辱高位請以死告使爲工正不失合名故事昭彰卑誠悃悃守道而得無陞

矣登門而免見餌之但願藥曰留恩終有凌雲之望著簪挂念永無委地之愁干冒台威下情無任懇迫憂兢之至謹啓

謝加料錢狀

右某今日某官奉傳處分每月加給料錢二十貫者某厚沾職俸過贍書糧羝羊之角且不羸驢鼠之腹能易滿惟憂福盛難報恩深豈料筆端乏白鳳之詞日無可效囊底獲青蚨之術月有所增但懷臨谷之心恐敗負山之力惟願除供陋巷之食分濟遠鄉之親同感厚恩

永傳遐俗或成浮費必速幽誅下情無任荷戴兢惶涕泣之至

謝衣段狀

某啓伏蒙恩慈賜及生衣段一十匹者伏以風雖解愠日可畏威始當蒸鬱之時忝受鮮華之賜敢效八公之侶欲銜六銖但隨百姓之歡同歌五袴况乃某幸趨台陞榮託德門實資千載之遭逢每濟四時之服飾愍念而情踰父母稱揚而禮異賓僚今者輕縠衫材細練襦制俾趨儉慕許曳鄒裾雖恩耀遠人足呈妍於鮫室而

名慙奇士甘致刺於鵝梁下情無任感戴之至

謝借示法雲寺天王記狀

某啓昨日伏蒙恩慈借示修法雲寺天王碑綵毫乍閱俗眼初醒唯慙鐵印之庸流忽覩銀鉤之妙迹既成國寶豈許家藏竊聆將勒貞碑始揮神筆風亭減暑天酒呈祥固知垂露之蹤便成甘露况假崩雲之勢永耀法雲宜乎琬琰之詞鎮彼璫璫之地共傳嘉瑞永振芳聲然則隋煬帝之故都永爲寶窟謝將軍之舊宅終作福田下情無任捧讀祈禱榮懼之至其碑謹專諮納謹狀

謝示延和閣記碑狀

某啓昨日觀察衙推邵宗傳奉處分賜及延和閣記碑
本一軸者跪展真蹤仰窺臣節對銀鉤而手舞足蹈望
玉輦而魂飛膽揚伏以太尉力贍補天心勤捧日遂啓
遷都之議佇聆徒蹕之期恭候宸遊儼成壯觀但以尋
章摘句素非吳主之心進牘抽毫唯在陳王之命爰令
幕客謹撰碑詞支使侍御印門顏回融帳盧植能揮真
筆妙寫尊襟敘三年望幸之丹誠則鼓傳眾聽述一片
勤王之忠節則鏡照羣迷實乃酣飫德馨備陳事實永

使奇功祕畧皆令陋古榮今太尉相公志切迎鑾喜勝
覽檄旣贊美於凌雲百尺將掩能於入木八分遂乃親
染綵毫俾鐫翠琰隨手而龍蛇旋活迎風而劒戟交橫
畫玉點珠豈可比蘭亭醉本檄雲挑霧只宜示蓬島真
仙誰料末儒亦叨殊貺輒敢覬覦將顧是知誘諭辱庸
何則名題桂宮跡隸蓮府雖忝一時之有遇實無萬代
之可稱今者支使侍御以好善心得稽古力騁真才子
之藻思辱大丞相之筆蹤推爲賓席殊榮別是儒家盛
事則彼郭隗受黃金厚禮虞卿沾白璧深恩強欲比方

却成浼黷然則四方舐墨含筆之士也莫不競效嚙眉
之態潛希唾口之恩仰脩脩然勤慥慥爾如某者學海
至海雖云有心執柯伐柯猶恐傷手持弊箒而徒增健
羨遇神錐而便欲投降唯願讀五千卷之書庶幾入室
把十九年之刃無愧發硎每覩仙書更敦壯志稍希異
闕黨童子何敢望儒林丈人其所賜碑唯慎捧持敢矜
披閱待過天池之外遍誇日域之中想彼驪龍領下之
珠永當減價巨鼇頭上之客必欲偷看下情無任寶玩
師仰之至

謝改職狀

右某伏蒙仁恩特賜公牒改署館驛巡官今隨旌旆西
去者雖命重難荷而身輕欲飛稱心懷捧檄之榮滿口
詠從軍之樂唯慙幽劣有辱獎憐感恩而既識海深舉
步而但憂冰薄况無孫奉之精騎自比顏峻之小兒將
何以剖析事機游揚德業然所願者得睹龍飛玉劔豹
製牙旗風雷振大捷之聲日月照中興之運則某也有
望於一言長價或爲天上之人萬里從知免作池中之
物行唯踴躍坐則禱祠下情無任榮抃兢灼之至謹齋

沐祇候陳謝

謝探請料錢狀

某啓某頃者西笑傾懷南音著操蓬飛萬里迷玉京之
要路通津桂折一名作金榜之懸疣附贅乃是常常之
事徒云遠遠而來海隅未覺於榮家江徼况勞於佐邑
由是詠南陔而引咎望東道以知歸伏蒙太尉念掃德
門許遷代舍濡毫染牘深慙雪苑之清才頂豸腰魚遽
忝霜臺之峻秩傳天上披衷之命榮日邊垂白之親以
宣父見知則實同陳隼以遠人多幸則不讓漢貂雖乖

就養無方久想宗族稱孝然而煙波阻絕難申負米之
心風雨淒涼空灑梁山之泣既疎溫清又闕旨甘但切
責躬敢言養志况又無鄉使難附家書唯吟陟岵之詩
莫遇渡溟之信今有本國使船過海某欲買茶藥寄附
家信伏緣蹄涔易竭溝壑難盈不避嚴誅更陳窮懇伏
惟太尉念以依門館次三千客別庭闔已十八年既免
行傭有希反哺特賜探給三箇月料錢所冀祿遂及親
遠分光於異域志能求已永投跡於仙鄉干黷台階下
情伏增感泣兢悸懇迫之至其請錢狀別具上呈云云

木苑筆集卷十八
十一
與恩門裴秀才求事啓

某伏念身托德門光生異域雖池蛟得雨無沈埋末路之憂而海燕含泥有點汚畫梁之罪跡賤而兢惶倍切恩深而展效何期豈合更寫卑誠仰塵尊德但以事非獲已情或可哀不辭鈇鉞之誅冀滿斗筲之望伏緣某昨聆座主侍郎王銓東洛道路不通且在襄州行李極困早欲發遣專使切緣力未副心今有諸兄弟裴瓌遠將窮懇相告輒具別狀干瀆台階下情無任戰灼之至

前湖南觀察巡官裴瓌啓

右件人是某座主侍郎再從弟某去乾符三年冬到湖南起居座主侍郎之時見於諸院弟兄中偏所記念自數年繼遭剽劫生計蕩盡骨肉凋零久在江南近投當府願披情懇泣告尊慈駐畱多時不幸疾苦遂且扶持發去云欲逕往襄陽迎接侍郎今得書云行至滁州前去未得道途既阻溝壑是虞况乃孤孀三十餘口更無產業未卜定居伏緣某家寄日邊路踰天外杳無來信固絕他圖既無寸土以分耕寧有尺波而假潤是以不量僭越輒具薦論命懸沸鼎之中目斷台階之下非不

知將虎鬚之險非不知探龍領之難但緣旣忝門生豈
論賓貢鴛鴦之與螻蟻感恩皆同多士之與遠人報德
何異伏乞太尉相公念以程窮計盡缺其柱促聲哀特
賜於廬壽管內場院或堰埭中補署散職所冀月俸俸
入便獲安家裴璆卽自到襄州令弟璠仰副驅策不度
涯分洩瀆尊嚴下情無任感泣兢懼之至

獻生日物狀

某啓伏以降跡仙山爲行恩於俗界挺神維嶽期定亂
於危時是以杞梓材長松椿壽永名字已標於金錄兵

符暫理於玉鈴伏惟太尉相公員嶠稟靈尼邱誕質大
任天降中庸日彰四夷識傾膽之門遠棲仁蔭萬姓歸
返魂之域盡飽德馨况今秦甸停氛鎬京聚孽息虎旅
奔沈之思望豹篇擒縱之機暫施決勝之謀永致昇平
之運則必坐寧環海後當去會瑤池五色輕雲鎮隨行
止千年素鶴競效驅馳獨保長生卻登真位調鼎佐玉
皇之命銜杯聽金母之歌自此漢室公卿仰羨而空知
望斷仙家朋友相逢而不訝來遲某居近鼇峯遇深驥
坂每睹張良之術唯吟郭璞之詩喜對今辰敢陳善祝

龜蛇病骨叨承救活之恩雞犬癡心竊有奮飛之望下
情無任虔禱依攀欣抃之至輒以海東藥物輕贖尊嚴
謹具別幅伏惟俯賜念察謹狀

又狀

某啓某聆天降賢人濟天下之人也是以材合地寶性
契天和高闢德門深匡帝室伏唯太尉相公漢師仙格
魯聖儒機推心於三代之英鍊氣於五行之秀今者正
融韶景共慶誕辰四方飽開閭之恩萬族獻稱觴之懇
伏惟龍韜暫展靜卷妖氛鳳輦遄歸永興清運然後誠

白石生之妙術從赤松子之勝遊鼇頭擎五色之雲久
勞西望豹尾指二京之路蹙事北征佇揚滅寇之勳便
舉朝真之禮某棲身大廈祝壽中春下情無任禱祠歌
詠欣躍之至謹具別狀輒申微誠伏惟恩慈俯賜念察
謹狀

物狀

海東人形參一軀 銀裝龕子盛

海東實心琴一張 紫綾袋盛

右伏以慶資五福瑞降三清中春方盛於香風上德乃

生於遲日凡荷獎延之賜合申獻賀之儀前件人參並
琴等形稟夫成韻含風雅具體而既非假貌全材而免
有虛聲况皆採近仙峯攜來遠地儻許成功於藥曰必
願捐軀如能入用於蓬壺可知實腹誠慙菲薄冀續延
長塵躋尊嚴倍增戰灼伏惟俯賜容納下情幸甚

蓬萊山圖一面

右伏以重陽煦景仙界降真雖長生標金籙之名而眾
懇祝玉書之壽前件圖千堆翠錦一朵青蓮雪濤蹙出
於墨池鯨噴可駭雲嶠湧生於筆海鰲戴何輕不愧瑣

微輒將陳獻望臥龍而股慄隨賀燕以魂飛伏惟畧鑑
心誠俯賜容納所冀近台座而永安寰海展仙齋而便
對家山許沾一顧之榮預報三清之信輕躋視聽下情
無任禱祝歌謠兢灼之至

人參三觔 天麻一觔

右伏以昂宿垂芒尼邱降瑞始及中和之節爰當大慶
之辰仰沐尊慈合申卑禮前件藥物採從日域來涉天
池雖徵三極五葉之名慙無異質而過萬水千山之險
貴有餘香不揆輕微輒將陳獻所冀海人之藥或同野

老之芹伏惟特恕嚴誅俯容情懇續靈壽則後天而老
駐仙顏而與日長新下情無任禱祝忻躍兢惕之至謹
狀

端午節送物狀

織成鞍幪一條

右伏以晏陰將定令節俄臨遇天地之仁時睹江淮之
樂境伏惟太尉應五百年景運用八千歲為春仰贊薰
風高揚畏日不假渡瀘之役自成匡漢之謀某忝在末
寮合陳微禮前件鞍幪鴛機呈妙獸錦成華當憩影於

追風或資光於照地伏願鞍也助百福永安之慶幪也
表四方率服之誠干躋尊嚴下情無任禱祝兢惶懇激
之至伏惟俯賜容納謹狀

雪扇一柄

右伏以星火揚輝雲峯聳影遇陳太守饗遙祠之節效
華封人祝仙壽之誠前件扇細糝飛綿輕鋪凍練雖假
丹青之跡實含潔白之姿裁規則不學齊紈空誇圓月
委質則願依孫閣得振仁風謹獻台堦無任悚慄伏惟
俯賜容納百生榮幸謹狀

謝新茶狀

右某今日中軍使俞公楚奉傳處分送前件茶芽者伏以蜀岡養秀隋苑騰芳始興採擷之功方就精華之味所宜烹綠乳於金鼎泛香膏於玉甌若非精揖禪翁卽是閒邀羽客豈期仙貺猥及凡儒不假梅林自能愈渴免求萱草始得忘憂下情無任感恩惶懼激切之至謹狀陳謝謹狀

謝櫻桃狀

右中軍使俞公楚奉傳處分伏蒙賜及前件櫻桃者伏

以三春之下始闔羣芳百果之中獨誇先達綴仙露而堪教鳳食被德風而皆許鶯含遂令摘自喬枝分其美實豈期末品亦荷深恩捧持而色奪楚萍咽啜而味欺蘇橘何必貯赤瑛盤上最宜對白玉樽前勻排萬顆之珠不唯眼飽似服一丸之藥便覺身輕下情伏增感戴之至謹奉狀陳謝謹狀

謝冬至料狀

右伏蒙仁恩特賜前件節料者伏以某忝棲德宇不愧異鄉萬里滄波雖恨絕東來之信三冬愛日且歡迎南

至之辰豈料尊慈別垂厚賜玉粒既資於同穎霜華乃出於兩歧不勞大嚼之言卻懷中聖之慮莫識酬恩報德唯知飽食醉吟下情無任兢懼之至謹狀

謝寒食節料狀

右伏蒙仁慈特賜前件節料米麪羊酒等者伏以缺人舉合回祿沮威正吟化俗之仁風又對順時之甘雨仰沾豐饌過瞻新炊况乃蟻慕芳羶蛆浮清醞捧恩光而飽飫豈止三朝玩春色而醺酣可期千日祇知歌詠何報陶鈞下情無任感戴之至謹奉狀陳謝謹狀

謝社日酒肉狀

右伏蒙恩慈特賜前件酒肉等者伏以候燕應期句龍受祀一半之韶光欲老千般之旅思相攻只知吟樂國之春豈料捧仙家之賜陵分甘臠淮減香醲想田夫醉舞之場起海客狂歌之興敢效陳平壯志便發大言唯尊徐邈前蹤畧拌中聖其肉並酒謹跪頌訖下情無任感戴之至謹狀

謝匹段狀

緋羅 紫綾 紫天淨紗 紫平紗 黃平紗

黃綾 黃絹 熟綿綾袴段

右伏蒙仁慈特賜前件匹段霞舒鳳縷雪疊鮫綃猥分絳帳之餘俾換褐袍之飾不學王尼巧說遽叨盧志殊榮唯慙蠅蟻之姿不稱蜉蝣之什但願勵食藥飲冰之節報披朱拖紫之恩下情無任感戴兢惕涕泣之至謹奉狀陳謝謹狀

桂苑筆耕集卷十八終

南海譚瑩校

桂苑筆耕集卷十九

別紙狀書共二十首

別紙狀

別紙九首
狀一首

上座主尙書別紙

賀除吏部侍郎別紙

賀除禮部尙書別紙

濟源別紙

迎楚州行李別紙二首

五月一日別紙

謝降顧狀

與金部郎中別紙二首

書 十首

與容將書

謝宋綯侍御書

答裴拙庶子書

謝高祕書示長歌書

謝李琯書

謝元郎中書

謝周繁秀才以小山集見示書

與壽州張常侍書

賀楚州張義府尚書書

與假牧書

上座主尚書別紙

不審近日尊體寢膳何似道惟滌慮德以潤身致五福
之併臻迎百靈之所薦伏惟節宣無爽時望有歸某竊
窺曩史之傳芳備載達僚之晦跡疏太傅登其祖帳僅
涉沾名陶朱公泛彼柏舟未忘邀利豈若尚書中庸守
志大隱存神表獨見之能察未萌之事遂得高揚素節

夙避危時到處烟塵不污指鴻之目終年雲水能怡夢
蝶之心然而宸鑑屢回物情猶鬱鬱欲作山中宰相其如
天下蒼生卽期大駕還京必赴上台虛位斯乃萬乘瞻
矚四方禱祈某海燕含泥忝棲雲屋池蛟得雨早脫塵
塗感恩自比於互鄉仰德但思於闕里唯願泥沙賤質
永資陶冶深恩卑情不任攀戀虔祝涕泣之至謹狀

賀除吏部侍郎別紙

某啓伏承榮膺寵命伏惟感慰張司空之一匡西晉則
藻鑑無倫謝太傅之忽起東山則烝黎是念苟欲幽棲

悅志獨處忘懷緘輝而耻耀秦臺蘊味而懶調殷鼎則
乃智者仁者止傳樂山水之名賢才俊才盡失脫塵泥
之望羣情久鬱美命遂行今者侍郎靜揖巖扉高提銓
管萬族仰清通之譽一時進寒素之徒致使關中之寇
孽災消海內之英雄道泰近又竊聆風議仰測天心必
謂文司再歸重德然則任賢得地旣叶五百年之期好
學趨門必盈七十子之數繼集仙遊於蓬島盛傳儒禮
於杏壇旣搜虹玉驪珠皆成國寶佇見臺鸞閣鳳永作
家禽某伏思萬里無依久勞漂蕩十年有遇幸遂奮飛

異鄉榮垂白之親達路豸披朱之飾昔名士爲李公御
者喜抃猶多今遠人稱尼父生徒光輝無比陳至懇而
喙輸三尺望深仁而腸結九回下情無任抃賀踴躍感
激之至伏惟俯賜念察謹狀

賀除禮部尙書別紙

伏承天恩榮膺寵命伏惟感慰昔子貢曰夫子之文章
可得而聞夫子之言性與天道不可得而聞也然則至
於四科弟子窺測尙難况是萬里遠人鑽仰何及固不
效尤於篆刻請益於琢磨強搜類鶩之詞是黷猶龍之

德今者遠聆美命俯切歡心望峻中臺迴冠鴛鷺之列
恩深大廈空傾燕雀之誠伏惟捨念雲泉拯民塗炭輔
弼契千年之運奸雄避七日之誅某跡忝諸生身拘倖
職末由陳賀下情無任抃躍兢惶禱祝之至伏惟俯賜
念察謹狀

濟源別紙

不審近日尊體何似伏想孟津別壤沈水清源風清而
歛枕泉聲雲曉而捲簾山色旣見境含秀麗固當道脫
冲和伏惟每慎寢興早歸變理顯驗月中之夢贊成天

下之春卑情無任攀戀禱祝之至謹狀

迎楚州行李別紙二首

不審近日利涉長淮尊體寢膳何似伏以源滋桐柏浪
接蓬萊雖慙臨鬱煥之期而宛對清虛之境開樂鏡而
真同月映泛膺舟而况值風調誰言避地之行實叶濟
川之業伏惟緩飛仙棹靜運真筌庶納休禎每加遵護
卑情懇望謹狀

又

某啓今日某日專使至伏蒙恩慈特降尊誨跪讀欣抃

不任下情伏審尙書遠赴天庭將遵水道整蘭橈而思
郭泰指桂苑而訪劉安睹神仙則楚俗皆驚聞雅頌則
魯儒相賀况某材實慙於楛矢跡嘗列於蓬壺爲倚德
門獲棲候府今者佇迎鶴駕卽覲龍章既知天幸遭逢
唯切日深踴躍且曾替陳浴沂之志只見虛談仲由悅
浮海之言終非實事輒以管窺廷擊真爲古陋今榮卑
情無任攀戀欣抃兢惕之至云云

五月一日別紙

某啓伏以黃雀風高蒼龍星耀弄雨而梅雖應夏鋪煙

而麥已驚秋時定晏陰缺資全德伏惟尙書處身無躁
深守禮經視履考祥雅符易道恬澹則老聃讓美清虛
則周顓懷慙冰光長泛於玉壺豈須獨映天意久留其
金鼎唯望親調方當鷁泛仙舟必見鳳銜睿筆入康帝
室永福寰區下情無任虔禱鬱戀激切之至謹狀

謝降顧狀

某啓某未遂山棲尙從塵役所居官舍深在軍營雖異
衡門實同陋巷旣乏君章之蘭菊可襲馨香空餘仲蔚
之蓬蒿偏資寂寞春日則蝶牽晝夢秋風則蛩助夜吟

以此爲娛無他所覲今者方經離亂再獲起居但喜攀
父母之恩却慙下兒女之淚况某叨榮秦爵就學漢儀
姜維之膽氣雖麤鄧艾之口詞甚訥唯深感激莫備啓
陳伏蒙尙書念以遠方察其獨立俯憐素志每煦溫顏
聽及階及席之言佇銘骨銘肌之懇早來又蒙降三清
之僊駕顧一畝之窮居方慙隨入室之賢豈料忝式廬
之念非所敢望將何自安莫不思光遠耀於殊鄉卑迹
永超於末路揣庸賤則華夷有隔較輝榮則古今無倫
數年乖豹隱之期常低俗眼此日覩鳳儀之後豁展愁

眉下情無任感戴欣抃兢惕之至謹祇候起居陳謝謹
狀

與金部郎中別紙二首

不審近日尊體寢膳何似既明且哲則詩美賢人視履
考祥則易稱君子既樂持盈之道固安養素之機况屬
遲日載陽光風遍煦燕歌鶯舞深資酌桂之歡智水仁
山靜悅據梧之興伏惟永資景福早副急徵擲元賞於
煙霞濟蒼生於塗炭羣情禱望天下幸甚謹狀

又

某啓某仰審格言側窺性行人能宏道賢臣以致堯舜
爲先世實須才俊士以效巢由是恥古者只傳於方策
今也共仰於德門伏惟郎中大雅含清中庸處厚旣以
高名肅物能將全德鎮時柱清空而嶽頂無雲瑩秋色
而潭心有月比者蘭拋粉闥竹領朱轡出分天子之憂
來慰海人之望况彼郡也戶吞越水窗列吳山得袁宏
舉扇之風靈濤宿怒使謝運枉帆之路釣渚含春及其
五袴傳歌百錢流譽尋迎睿渥遙陟華資懷寶令名誰
發迷邦之問司珍正位佇成匡國之謀而乃得之若驚

直而不倨選勝於巖軒澗戶貪歡於酒賦琴歌久聆萬
乘虛懷忍見四方失望今者梟聲向息鳳紀重興晉傅
長才待示指南之制魏牟積變佇申拱北之誠入覲奠
階坐調梅鼎豈止應月中之夢必期成天下之春然則
致堯舜之大猷永匡宸展效巢由之小節不改尊襟某
遠賈鮫綃慙非重價仰趨馬帳忝預生徒下情無任攀
戀禱祝兢惕之至云云

與客將書

某腐芥無依斷蓬自役長走而未離塵土獨行而轉困

路歧昨者遠抱危誠專趨朗鑑竽聲恐濫琴調空悲伏
蒙將軍念某來自異鄉勤於儒道曲乖提挈得遂獻投
指喻情深師冕不爲瞽者獎知言重卞和免作罪人荒
淺何堪輝榮已極但以某無媒進取有志退居以詩篇
爲養性之資以書卷爲立身之本卻緣雖會食祿未免
憂貧趙彙則到處長空范甌則何時暫熱况乃家遙四
郡路隔十洲窮愁則終夜煎熬遠信則經年隔絕時情
冷澹俗態澆訛買笑金則易求讀書糧則難致天高莫
問日暮何歸始知學者之心須托至公之力今幸遇相

公山包海納雨潤風行有片言可獎者稱譽出羣有小
技可呈者隨材入用是以無一物不歸美化無一夫不
荷深恩然則舉中國之人咸承煦育豈可令外方之士
獨見棄遺某不揆庸才敢投清德豈料將軍許垂拯拔
每賜吹噓他人之得喪榮枯皆推命分小子之昇沉進
退只在恩私儻或特假重言終榮賤質唯托針能入線
則同錐得處囊某已倚宦途粗諳吏道如能驅策未必
踰藏終當富見室家豈憚職榮州縣實以流年易邁壯
氣難申唯望庶得期變化所冀燕棲雲屋永無巢幕

之危鶴出塵籠稍識乘軒之便今欲專修啓事再獻相
公少申感謝之懷預寫辭違之懇未知可否先取指塵
且某也姜維之膽氣雖麤鄧艾之口辭甚訥縱申拜謁
難具啓陳聊托牋臺代披肝膈未能患已先切求仁將
軍之心若鏡焉無幽不察小子之身猶箭也唯命是從
干浼旣頻慙惶益切伏惟終始俯賜念察謹狀

謝宋綯侍御書

伏蒙殊造俯念移居借賜官車得離旅館簪笈則免勞
自負簞瓢則各職所安如承命駕之恩但勵抹輪之志

今者卜鄰甚靜學殖可成惟局袁粲之門不掃陳蕃之
室雖乘機立事輸他附勢之榮而守道安貧贏得愛閒
之樂既諧素志但感深恩伏惟終始俯賜念察謹狀

答裴拙庶子書

某遠離海島旅宦江皋比者暫願退居稍期肄業來投
樂國冀濟窮塗本望少贍山資便諧谷隱伏蒙太尉念
以雀有多病鶴自遠來特署職名俾趨恩化尋緣狂花
有失腐芥無依轉知山鹿野麋唯宜退縮永謂鴻儔鵠
侶不合攀瞻况乃器比斗筭之人身隨刀筆之吏旅舍

既拘於雉堞閒門可設其雀羅自前年伏承庶子暫阻
朝天偶來避地便欲托金牌之幸會敘玉李之獎憐專
候起居願搜誠懇蓋慮跡賤而動多悔吝才微而易見
棄捐強自微攀舊恩是爲玷浼清德以此跼藏形影綿
歷歲時雖知提筭有門唯恐負荆無路豈料庶子恕以
未陳禰刺先降劉賤閱溫言而楚纊覆身捧華翰而陪
珠耀掌兼蒙賢弟起居未移曩顧遠賜榮緘不遺異域
之人特辱同年之字金膏珠粉既垂摩拂之恩驥尾龍
髯重有依攀之望莫不駑駘長價瓴甌生光不唯誇術

於親朋實所輝榮於遠俗謹當占筮撰日齋沐拜塵墮
肝而盡懃卑誠擢髮而少逃厚責其他所奉尊旨謹具
別狀啓陳云云

謝高祕書示長歌書

伏蒙特飛榮誨寵示長歌玉海金山難測高深之本北
方南國徒觀美麗之姿贊詠無堦師資有路正如青蓮
居士唯誇散誕之詞白石山人只騁荒唐之作但以風
月琴樽爲勝槩不以君臣禮樂爲宏規遂使千年萬年
所流傳皆嗟大雅小雅之淪弊今覩四十三叔行出人

表言成世資弄才子之筆端寫忠臣之襟抱在今行古
既爲儒室之宗憂國如家固是德門之事天有耳而必
當悔禍雲無心而亦可銷兵一言自此興危邦六義於
斯歸正道則所謂陳平宰社爾曹何知鄧艾畫營其志
不小永言他日足驗前程某畏影雖迷偷光匪懈既知
閱寶直若發蒙唯願將鵬舉篇章傳於異域豈獨以伯
魚對答誇向同聲下情但增感戴欽仰嗟歎之至續專
祇候陳謝

謝李瑄書

某啓某今月十日得祇候見太尉渤海風息蓬萊路通
慙非席上之珍謬作壺中之客伏蒙溫顏見煦陋質增
榮鳳翼龍鱗終容攀附癡鷹鈍犬特許指呼勉其檢慎
之心諭以獎憐之意此皆副使不遺薄藝累發重言始
當獨臥北窗如蛙跳井豈料榮趨東閣似鶴乘軒風雲
旣識於因依冰谷不遑於安處感唯以泣誠止無言伏
緣旣忝從軍難爲乞假不獲祇候陳謝

謝元郎中書

某啓伏蒙太尉恩慈特賜轉職不任歡慶某元菟微儒

焦螟瑣質早因慕善偶獲成名爾後客路多愁候門寡
援麻衣始染於藍色竹簡尋推其桂香伏自去年刺謁
燕臺職叨鄭驛皆蒙郎中推心獎念假力薦揚使孤根
無委地之虞短翮有凌雲之望今者忽忝非常之遇深
慙不稱之譏雖樂從軍安敢尸祿且鷄披隼翼已覺非
宜雞處鶴羣固當自責時日已具狀辭讓以此未敢祇
候陳謝伏蒙恩私特降榮誨奉讀欣抃不任下情

謝周繁秀才以小山集見示書

昨日早謁元成晚歸弊止覺戶庭之發光彩聞几案之

散馨香遂因驚訊僕夫果得捧承畱示温辭一幅粲然
受益之規雅什九篇蔚矣思多之思莫不振紀綱於六
義飾冠冕於七言既宗大雅之基實播中和之響伏以
諸從事鴻儔鵠侶鳳翥鸞翔集桂苑之名都占蓮池之
雅望二十三官卽先輩備觀周樂深閱楚材各陳贊詠
之詞能展縱橫之作筆皆實錄機不虛張始窺八首之
前只謂衛多君子終覽九華之後方知魯出聖人某今
所以禱望者翠輦早遇東巡白環免勞西獻二十三官
百步穿葉一飛冲天姮娥則迎入桂宮王母則引歸蓬

島然後輟勝遊於御氣展長策於濟時來登郭隗之臺
坐弄陳琳之筆則乃今朝麗藻已掩八仙公之名他日
賓筵必盈缺才子之數見邱門之請禱待陳榻之解懸
某便欲銜璧乞降樞衣請益但以志勤詞戰唯將築室
反耕道拙世塗僅類杜門却掃未獲面申感謝謹專修
狀啓陳云云

與壽州張常侍書

當今聖天子在上賢丞相在下然而宿德令望可推者
唯我上公暨滑臺中令兩地而已初常侍靜芟前弊權

握使符我上公以理狀聞請爲真守帝惟曰俞後常侍
撫安郡俗振肅兵威大元帥以雄才薦請貳前驅帝亦
唯曰俞是得弄印分榮剖符行化踰月報政盡活疲甿
實謂壽之人永居壽域矣則乃常待遇賢丞相之知入
聖天子之用乃武乃文多才多藝固以播在四海某豈
敢一二而談詠也今所禱願者碧幢紅旆高引前途相
幕將壇別張勝地謂予不信神之聽之

賀楚州張義府尚書書

國家自兵興以來爵賞旣多官榮甚峻然而常恐授受

之未能宜稱盡善盡美固當有待今則尚書以累世勳
望以數年戰功始假使符旋迎真命某將趨清德獲聽
好音欣抃之來雀躍而已則非獨喜尚書展龔黃之美
政實乃賀聖天子之得良二千石也伏惟云云

與假牧書

伏以近日俗尚書題言矜贊祝苟非全德多是愧辭某
執性近愚處身斯直以目所覩以耳所聆方敢詠歌固
無諂笑某自達仁境如歸故鄉見百姓之安則知三軍
之樂也見鄉閭之泰則知郡邑之肅也若非常侍寬猛

相濟恩威並行則何以至村落之居室家相慶自近及
遠嬉嬉然喜遇慈父然則政成一境名達九重卽計冠
聳豐貂旃翻建隼榮膺真拜大洽羣情某每聽謳謠深
增禱祝伏惟昭察謹狀

桂苑筆耕集卷十九

南海譚瑩校

桂苑筆耕集卷二十

啓狀別紙祭文詩共四十首

啓 一首

謝許歸觀啓

狀 三首

謝行裝錢狀

謝再送月料錢狀

謝賜弟棲遠錢狀

別紙 五首

上大尉別紙五首

祭文 一首

祭嶓山神文

詩 三十首

陳情上太尉詩

奉和座主尚書絕句三首

歸燕吟獻太尉詩

酬楊贍秀才送別詩

行次謝太尉衣段詩

畱別女道士詩

酬進士楊贍送別絕句

楚州張尚書謝相迎詩

酬吳巒秀才絕句二首

石峯詩

潮浪詩

沙汀詩

野燒詩

杜鵑詩

海鷗詩

山頂危石詩

石上矮松詩

紅葉樹詩

石上流泉詩

和友人除夜見寄詩

東風絕句

海邊春望絕句

春曉閒望絕句

海邊閒步詩

將歸海東嶼山春望詩

和金員外贈嶼山清上人絕句

題海門蘭若柳絕句

謝許歸觀啓

某啓早來員外郎君傳奉尊旨伏蒙恩慈念以某久別
庭闈許令歸觀者仰銜金諾虔佩玉音雖尋海島以榮
歸古今無比且望烟波而感泣去住難安伏緣某自年
十二離家今已二九載矣百生天幸獲托德門驟忝官
榮仍叨命服一身遭遇萬里光輝是以遠親稍慰於倚

門遊子倍榮於得路唯仰趙衰之冬日深暖旅懷豈唯
張翰之秋風遠牽歸思且并年并歲久泛海程遙佳傷
烏鳥之情去懷犬馬之戀唯願暫謀東返並待西來仰
托仁封永安卑跡今即將期理缺但切戀軒下情無任
感戴兢灼涕泣之至謹奉啓陳謝云云

謝行裝錢狀

伏蒙仁慈特賜錢二百貫又令辦行裝者謹依處分捧
領訖伏以某學虧力行事過心期燕鶯銜泥點汚常慙
於廣廈鼇頭抃嶽低徊暗避於連鉤每慎行藏深規躁

靜豈謂謙而受益或希屈以求伸今者果逢尊慈令將
遠命榮歸故國免挈空囊比陸生南說之橐裝倍多輝
煥異孔氏東還之輜重豈慮焚燒且彼虞卿白璧郭隗
黃金徒欲耀名終非濟事是若念其就養愍以食貧減
二十日之堂封濟數千里之家信累載莫申其勞苦一
朝頓贍於旨甘寧親而既佩銀章倍榮衣錦戀德而但
垂珠淚願效賣綃下情無任感恩榮抃涕戀兢惕之至
云云

謝再送月料錢狀

某啓昨日軍資庫送到館驛巡官八月料錢伏緣某將
 命遠方已奉公牒暫離候館卽指歸程既蒙別賜行裝
 豈令缺缺職俸缺難領受遂便送還不知庫司具狀申
 上上伏奉缺缺者筆飛雲鳳顯示深恩緡耀天龍仰資
 厚缺缺遂還家之望實驚潤屋之言遠地賤微雖有慙
 於缺缺故鄉親識必致敬於金多通神則益驗魯褒執
 癖則缺缺缺缺伏以尊卑禮隔辭讓無由謹依處分跪
 領訖下情無任感恩戀德激切徘徊兢灼之至云云

謝賜弟棲遠錢狀

某啓某堂弟棲遠比將家信迎接東歸遂假新羅國八
 淮海使錄事職名獲詣雄藩將歸故國昨者伏蒙仁恩
 特賜錢三十貫者伏以崔棲遠遠涉煙波大遭風浪僅
 存微命唯有空身雖志切鵲鴿竊慕在原之義而譽慙
 騏驎難期得路之秋銜蘆而但喜聯行泛梗而免虞失
 所今者某以榮奉使得遂寧親貨泉沾潤之名實稱子
 母歸路光榮之事皆屬善人下情無任感恩欣躍兢惕
 之至

上太尉別紙五首

某啓昨以鄉使金仁圭員外已臨去路尙闕歸舟懇求
同行仰候尊旨伏蒙恩造俯允卑誠今則其別淮城齊
登海艦雖慙李郭之譽免涉胡越之言路遠無虞不假
琴高之術巨川能濟唯懷傳說之恩下情無任感戀之
至云云

又

某啓伏奉手筆批誨一行人並喜將息穩風濤者俯顧
微流仰窺尊念望淮海則陟遐自邇指風波則視險如
夷遍灑溫言盡叨恩於挾纊缺敷至懇願無愧於賣綃

下情無任感激攀戀兢灼之至云云

又

伏奉尊誨藥袋子懸於船頭不畏風浪慎勿開之者仰
掛青囊遠踰碧海必使天吳息浪水伯迎風旣無他慮
於葭津可訪仙遊於蓬島唯願往來無滯忠孝克全萬
里安流永缺濟川之力百年苦節不欺臨谷之心下情
無任感戴兢灼之至

又

某舟船行李自到乳山旬日候風已及冬節海師進難

木苑集卷二十一
二
懇請駐畱某方忝榮身唯憂辱命乘風破浪既輸宗慤
之言長楫短篙實涉惠施之說雖仰資恩煦不憚險艱
然正值驚波難踰巨壑今則已依曲浦暫下飛廬結茅
茨以庇身糝藜藿而充腹候過殘臘決撰行期若及春
日載陽必無終風且暴便當直帆得遂榮歸謹具別狀
咨申伏惟云云

又

某啓自叨指使唯欲奮飛必期不讓秋鷹便能截海豈
料翻成跛鼃尙類曳泥雖慎三思而行且乖一舉之雋

既勞淹久合具啓陳某嘗讀國語見海鳥爰居止於魯
東門之外展禽曰今茲海有災乎夫廣川之鳥獸常知
而避其災是歲也海多大風冬暖伏見今年自十月之
交至於周正月畧無廢發倍覺温燠必恐魯修濫祀幽
改成詩靜思漢祖之興歌大風可懼遙想田橫之竄跡
絕島難依遂於登舟近浦止泊籠鵠無矢藩羊自安唯
願時然後行必當利有攸往泛艤艘而不滯指渤澥而
非遙冀申專對之能早遂再來之望伏惟云云

祭嶼山神文

維年年日新羅國入淮南使檢校倉部員外郎守翰林
郎賜緋銀魚袋金仁圭淮南入新羅兼送國信等使前
都統巡官承務郎殿中侍御史內供奉賜緋魚袋崔致
遠等謹以清酌生牢之奠敬缺懸于嶢山大王之靈竊
以昔辨方圓始分清濁融作江海結爲山嶽石戴土而
土戴石小者礫而大者巖然而罕有威神靜無稜角與
堆阜而相接見邱陵之可學惟靈磊磊落落高臨鯢壑
嶢嶢岳岳俯壓鯨潭上則爲雲霧縈纏之骨下則爲波
濤激射之窟朝則迎金烏而前出夜則送銀蟾而後沒

是以峻德能彰乎東夏西夷元功不假乎南條北忽則
彼織女之機倚河漢秦帝之橋架溟渤徒銜其名莫勞
我形每謂蘊藏其片玉豈唯廁列於雙瓊遂使往來者
虔度英靈祈禱者盡寫精誠旣蘋蘩之可薦信黍稷之
非馨今者仁圭等久銜遠命致遠也始奉殷聘喜歸舟
之旣同行遊轡之能竝不患胡越之意殊寧慙李郭之
名盛去歲初冬及東牟東屬以滄流尙遠元律將窮浪
形勺匄而鷁難浮艦風響羸鳳而鵠恐辭籠遂臆剗木
聊安斷篷一昨雖迎端月猶懼俊風延頸而待逢候燕

同眸而送盡歸鴻方期利涉龜從筮叶直指雞林輕浮
芥葉豈輸馳馬之號願較秋鷹之捷遠詣靈峯難尋壽
官但覩其青蓮倒蘸於巨浸碧螺高拄於晴空仰威靈
之聳塵外想影響之飄雲中於是潔饋饌擇肥醲酒醴
斯醺牲牲粗豐謹賚薄禮敢覬陰功伏惟大王潛施呼
喻密降指蹤使波神拱手川后斂容楚師之南風且競
鄭伯之東道豁通照水鏡之心既分妍醜擘土囊之口
無雜雌雄則可朝穿汗漫暮截鴻濛去採石華必同謝
運行吟肉脯免效張融加以某臨川自審登木增懍憶

昔雪作夜光冰爲夕飲幾年獨勵於鼓篋今日方期於
扇枕將問荊州之絹忝披會稽之錦見寵若驚心如捧
盈雖智有不逮而時然後行况賚御筆慮滯王程今則
裹裝旣飾儼有行色翫淑景以歌吟汎安流於瞬息唯
托大王之風早歸君子之國俾傳帝命無曠神職尙饗
陳情上太尉詩
海內誰憐海外人問津何處是通津本求食祿非求利
只爲榮親不爲身客路離愁江上雨故園歸夢日邊春
濟川幸遇恩波廣願濯凡纓十載塵

奉和座主尚書避難過維揚寵示絕句三首

年年荆棘侵儒苑處處煙塵滿戰場豈料今朝覲宣父
豁開凡眼睹文章

亂時無事不悲傷鸞鳳高飛出帝鄉應念浴沂諸弟子
每逢春色耿離腸

濟川終望拯湮沈喜捧清詞浣俗襟唯恨吟歸滄海去
泣珠何計報恩深

歸燕吟獻太守

秋去春來能守信暖風涼雨飽相諳再依大廈須知許

久污雕梁却自慙深避鷹鷂投海島羨他鴛鴦戲江潭
只將名品齊黃雀獨讓銜環意未甘

酬楊瞻秀才送別

海槎雖定隔年迴衣錦還鄉愧不才暫別蕪城當葉落
遠尋蓬島趁花開谷鶯遙想高飛去時楊生有隨行之計遼豕寧

慙再獻來好把壯心謀後會廣陵風月待銜杯

行次山陽續家太尉寄賜衣段令充歸覲續壽信

物謹以詩謝

自古雖誇畫錦行長卿翁子占虛名既傳國信兼家信

不獨家榮亦國榮萬里始成歸去計一心先算卻來程
望中遙想深恩處三朶仙山月畔橫

畱別女道士

每恨塵中厄宦塗數年深喜識麻姑臨行爲與真心說
海水何時得盡枯

酬進士楊贍送別

海山遙望曉烟濃百幅帆張萬里風悲莫悲今兒女事
不須悵悵別離中

楚州張尚書水郭相迎因以詩謝

楚天蕭瑟碧雲秋旟隼高飛訪葉舟萬里乘槎從此去
預愁魂斷謝公樓

酬吳巒秀才惜別二絕句

榮祿危時未及親莫嗟歧路蹇勞身今朝遠別無他語
一片心須不愧人

殘日塞鴻高的的暮煙汀樹遠依依此時回首情何恨
天際孤帆宰浪飛

石峯

中和甲辰季冬十月奉使東泛泊舟於大珠山下凡所入目命爲篇名嘯月吟風貯成十

首寄高員外

嶢岳絕頂欲摩天海日初開一朵蓮勢削不容凡樹木
格高唯惹好雲煙點酥寒影粧新雪夏玉清音噴細泉
靜想蓬萊只如此應當月夜會羣仙

潮浪

驟雪翻霜千萬重往來弦望躡前蹤見君終日能懷信
慙我趨時盡放慵石壁戰聲飛霹靂雲峯倒影撼芙蓉
因思宗慤長風語壯氣橫生憶臥龍

沙汀

遠看還似雪花飛弱質由來不自持聚散只憑潮浪簸

高低况被海風吹煙籠靜練人行絕日射凝霜鶴步遲
別恨滿懷吟到夜那堪又值月圓時

野燒

望中旌旆忽繽紛疑是橫行出塞軍猛焰燎空欺落日
狂煙遮野截歸雲莫嫌牛馬皆妨牧須喜狐狸盡喪羣
只恐風驅上山去虛教玉石一時焚

杜鵑

石罅根危葉易乾風霜偏覺見摧殘已饒野菊誇秋豔
應羨巖松保歲寒可惜含芳臨碧海誰能移植到朱欄

與凡草木還殊品只恐樵夫一例看

海鷗

慢隨花浪飄飄然輕擺毛衣真水仙出沒自由塵外境
往來缺缺洞中天稻梁滋味好不識風月性靈深可憐
想得漆園蝴蝶夢只應如我對君眠

山頂危石

萬古天成勝琢磨高高頂上立青螺永無飛溜侵凌得
唯有閒雲撥觸多峻影每先迎海日危形長恐墜潮波
縱饒蘊玉誰回顧舉世謀身笑下和

石上矮松

不林終得老煙霞澗底何如在海涯日引暮陰齊島樹
風敲夜子落潮沙自能盤石根長固豈恨凌雲路尙賒
莫訝低顏無所愧棟樑堪入晏嬰家

紅葉樹

白雲巖畔立仙姝一簇煙蘿倚畫圖麗色也知於世有
閒情長得似君無宿粧含露疑垂泣醉態迎風欲待扶
吟對寒林却惆悵山中猶自辨榮枯

石上流泉

琴曲雖誇妙手彈遠輸雲底響珊珊靜無纖垢侵金鏡
時有輕颺觸玉盤嗚咽張良言未用潺湲孫楚枕應寒
尋思堪惜清冷色流入滄溟便一般

和友人除夜見寄

與君相見且歌吟莫恨流年挫壯心幸得東風已迎路
好花時節到雞林

東風

知爾新從海上來曉窗吟坐思難裁堪憐時復撼書幌
似報故園花欲開

海邊春望

鷗鷺分飛高復低遠汀幽草欲萋萋此時千里萬里意
目極暮雲翻自迷

春曉閒望

山面嬾雲風惱散岸頭頑雪日欺銷獨吟光景情何限
猶賴沙鷗伴寂寥

海邊閒步

潮波靜退步登沙落日山頭簇暮霞春色不應長惱我
看看卽醉故園花

將歸海東巉山春望

目極煙波浩渺間
曉鳥飛處認鄉關
旅愁從此休凋鬢
行色偏能助破顏
浪聲沙頭花撲岸
雲粧石頂葉籠山
寄言來往鴟夷子
誰把千金解買閒

和金員外贈巉山清上人

海畔雲菴倚碧螺
遠離塵土稱僧家
勸君休問芭蕉喻
看取春風撼浪花

題海門蘭若柳

廣陵城畔別蛾眉
豈料相逢在海涯
只恐觀音菩薩惜

臨行不敢折纖枝

桂苑筆耕集卷二十一

南海譚瑩校

